

SANTIAGO KARTA

Israel ji'j mteewa jxuka ùssatx Santiago fxi'jni

¹ Israel nasa doce ji'jsa naa kiwete msuuwa jxuka ùssatx weçxana fxi'jaçthu Jesukristo vxite' Dxusna selpisáa Santiago yaasesa.

Dxus yakh sxiigmée fxi'zewa'ja's Dxus úçxáak kaajiyu'ju'

² Adx yakthē'jwe'sx, nxusmée meswe weçxweçxa yajkxna ma'wēsawa thēysa vxyaatewa.

³ Mjiyuwe: Dxusa's jweeíçxáa çxhāçxha yajkxya' piyakahníçxáak txā'wē thēysa' vxya'.

⁴ Aça' thēysa vxyaatewa ũukhnuwe, txāa thēysa' i'kwe'sx kīhte yuhwa sxiigmée jxuka Dxus yakh çxhāçxha fxi'zewa'ja's kaapiya'jsa'.

⁵ Maawa Dxus yakh fxi'zewa'ja's sxiiguuççxa', Dxusa'síiçxáa mpējxwe, aça' txā' wa'lmée maatxwa jxuka kaajiyu'juna i'kwe'sx pēynite thaakwe.

⁶ Nawa kuh jwed yajkxmée ũsyujuna sūhna yuuçxáa mpējxwe. Txā'wēme', kuh jwed yaakxsa' tee jwedteçxáa ũsmée íkh wala's wejxaa kēese'jni na'wē yuutxna.

⁷ Aça' txā'wē tee jwedçxáa yaakxsame' Dxusa' ũsuna sūhwa'j ji'phme'.

⁸ Maawa Dxusa' pasmée wáanakx sūhna e'z jwed yajkxna pēysa' bagaçxte yuhwa Dxus yakhçxáa fxi'zeya' yu' ājameena.

9 Maa yakhthě'jwa kīhwa ji'phmeesaçxawa weçxweçxa yajxna fxi'zewa'j ji'pha', Dxusa' pu'çxhina sūhna.

10 Aça' txā'wěy ji'phsawa txajx ji'phuni pçuwa'j en pa'thewa, wětwe't yaakxwa'j ji'pha', txāa pa'gatey naa kiwete ji'phsa' kitewa ma'wēga txaçxmeyna udxi' txā'wěysaçxá'.

11 Sek açaate', jxūth tasxa' udxi'k, naap-kaçxha' kitewa ubu'k, aça' zhiçxkwesa' kxtee pçu'k. Txā'wěy naa kiwete ji'phsawa txajx ji'phuni yakh pçuwa'jsaçxá'.

Ewmée yūuya' yaakxnisa's Dxusa' ūsu'çme'

12 Ewmeete kweete'jwa'jsa vxyaatewa, txā'sa' nwēese'jsame' wala yuh wětwe't yaakxwa'j ji'pha'. Txāa pa'gatey txā'wē yūusa' багаçxte yuhwa pçumée itxi fxi'zewa'ja's Dxus ūsya' neeyūuk txā'sa' jxpa'gawa'jsa' Dxusna nwēese'pha'ga.

13 Maawa ewmeete weteçxa', Dxus ne' txā'wēte wetewa'ja's vxit sūhwa'jme'. Dxusa' ewmeete wetewa'ja's багаçxte yuhwa ūsmeena. Txā' ewmée yūusame'.

14 Wejxwa peekx ūus ewmée yaakxni's nwēese'pha'gaçxáatx ewmeete wetena pa'ja'.

15 Na'wē ewmée ūus yaakxnik pkalte kweete'je', aça' txāa pkalku jweeiçxáa walaana u'jçxa nmehte' uuwa'jçxáa vxitna pa'ja'.

16 Yakhthě'jwe'sx mjiyuwe:

17 Na'wē Dxusa' cielute eena' kweethsatx jxuka vxitku sa' txā' āçxpkaçx le'çxkweçxáa yuhwa yu'pthehmée ūsa', aça' txajx tasxuçxaçxáa yu-usata' kīhwa ewsa yu' jxuka.

18 Txãak kwe'sxtxi peeygãhçxa txajx yuwe isasa's pta'sxçxa ewte fxi'zewaja's ũs, kwe'sx nyafxte txãa yakh utxasáa yuukahn.

Dxus yuwe ma'wẽ jxkaathe' kxtey yuusaaxáa Dxus yakh fxi'zesa'

19 Txãa pa'ga adx yakhthẽ'jwe'sx kĩhwa pta'sxni ewsa yu'sa' bagaçxtewa wa'lmée jxpa'gaya'çxáa meswe. Nawa we'wewa'j yu'sa' ũus yajkxçxa jxpa'yajkx mwe'wewe, sa' ũusçxawa'j yu'sa' wejx wala mpa'yajkxwe.

20 Txã'wẽme', ũusçxanisa' Dxus dxi'pte ewmeesa', aç'a' Dxusa' txã'wẽsa's jxpa'ga'çme'.

21 Txãa pa'ga kĩhwa ewmeesa nakwe wala pehnaya' duda' txãa yu'sa' jxuka nvxihtçxa, Dxus yuwe ewsa pta'sxni yuuk txã'sçxáana wa'lmée ũuste myu'akhwe. Dxus pta'sxni' i'kwe'sx ũusa's nwe'weya' ajawa'jsa'.

22 Nawa Dxus yuwe ma'wẽ jxkaathe' txã'sa' kxtey myuuwe. Wẽse'jsaçxáa yu' yuunuwe. I'kwe'sxa' jxpubanuwe. Ĩ'neeçxáa wẽse'jnisa' kxulsa'.

23 Maawa txã'wẽ Dxus pta'sxni's kxtey yu-umée ĩ'neeçxáa wẽse'jsa', peekx dxi'pa's spee-jute thegçxa

24 khũçxte uyçxawa txãa dudtey khukhmée u'jyã'jçxa' ma'wẽ peçxkanakx txã'wẽysa'.

25 Nawa wẽse'jçxa peçxkanamée, Dxus ley ewte nvxiit-sa jxkaahni's kxtey nwẽese'jsa', jxpubamée wêt fxi'zena Dxus jxkaahni's nwẽese'jna.

26 Maawa Dxus dxi'pte ewsath sũhçxawa ma'wẽwa we'weni's jxpa'yakxmeeçxa',

peekíçxáa jxpubasáa yuuna. Aça' Dxus dxi'pte ew fxi'zesath sũhni' kxul yuh yuuna.

²⁷ Dxus dxi'pte kĩhte yuhwa jxpubamée ew fxi'zesa' na'wě yũuwa'ja': Nmi' ji'phmée pu-uplesatx pu'çxna nxuste fxi'zesatx kvxiisxa'jna luuçx wakçxahtxwa txã'wěy yũuwa'ja', sa' naa kiwete ewmeesa peekx ũuste khěewe'sxte wala jxpa'yakxwa'ja'.

2

Nasa ma'wěsatxwa txãa na'wěçxaçxáa ew yũuwa'ja'

¹ Adx yakhthě'jwe'sx i'kwe'sxa' Jesukristo txakwe ewsana ũuste jxpa'gayã'jçxa', nasa maatxwa puutx ja'daçxah txãa na'wěçxaçxáa ew yũuwa'j ji'phi'kwe.

² Meeçxawa na'wě wáa yuune'kwe: I'kwe'sx pkhaakheni yatte teeçx piçthě'j ropa wala ewsa athçxa, vxyuu bee sultxhikha paatçxa u'kana, naapkaçxha' vxitewa pa'jana kĩhwa ji'phmée ropa iisxkwesa athçxa.

³ Aça' txãa ropa ewsa iijxũusa's ew jxpa'gaçxa kaçxni ewsate kaçx kajane'kwe. Nawa kĩhwa ji'phmée pxthaakuēesa's yu': Ayte myuju meeçxa' kxtee kiwete mkaaçx jĩne'kwe.

⁴ Txã'wě yũuçxa', puutx ja'daçxah txãa na'wěçxaçxáa ew yũusamée, vxite yu'sa' açeyaakxsaçxa txã'wě yuune'kwe.

⁵ Adx yakhthě'jwe'sx ew mwēese'jwe: Naa kiwete makwe kĩhwa ji'phmée pxthaakuēesaçxawa txãawe'sxa' Dxusa's yu' ma'wěçxáa yuhwa peçxkanamée ũuste yajkxna

fxi'zeçxa Dxus jxkaahna ũsnitewe'sxa's Dxusíi ũsya' neeyũuk Dxusna yaakxsatxi' txã'sna jxpa'gawa'jsata'.

⁶ Txã'wētewa, i'kwe'sx yu' txãa ji'phmée px-thaakuēesatxi' weeçxçxa ji'phsaçxáatx i'kwe ew we'we'. Nawa ji'phsaíçxáa i'kwe'sxtxi pkxuuçxa çkhuēs tasxsu kuutxa'jsamée wáatxna?

⁷ Txãawe'sxíçxáa Kristo yase's çaçewe'wesamée wáatxna?

⁸ Dxus ley maatewa thaakwesa we'weçxa': Vxite nasatxwa peeygãawa'ja' idx ma'wēga ya'peeygãja' txã'wēyçxáa jĩ'k. Aça' txã'sa' kxtey nwēese'jna fxi'zeçxa', ewsaçxah txã'wē yuune'kwe.

⁹ Nawa maatxwa jxuka txãa na'wēçxaçxáa ew yũumeeçxa', pkalte weteene'kwe, sa' Dxus jxkaahni leya's yuuwesa yuune'kwe, leya's jxuka nwēese'pha'gamée.

¹⁰ Maawa Dxus jxkaahni leya's ew yuh nwēese'jçxawa teeçx ahte le'çxkuēçxáawa jx-pubaana aça' txãa pa'gaçxáa Dxus jxkaahni ley makwetewa jxukak yuuwesa yu'.

¹¹ Miiyajkxwe wakx Dxus leya' na'wēk we'we': Ptamsayã'ja' vxitesa yakh pkal yuuwa'jme' jĩ'k. Sa' nasanawa ikhwa'jme' jĩnak jxkaaja'. Txã'wē yã'the', nasa yu's ikhmeeçxawa, vxitesa yakh yu' pkal yuuwáana aça' txãa pa'gaçxáa Dxus jxkaahni ley makwetewa jxuka nwēese'jsamée yuuna.

¹² Txãa pa'ga i'kwe'sxa' we'wewa'j ma'k yuu, meeçxa' ũus yaakxni yakhçxáa ma'k yuu, nawa wala jxpa'yakxmeete', i'kwe'sxtxi nwe'wesa leya' kastigaína.

13 Vxitetx peeygāhmée fxi'zesatxi' txã'wēy Dxuswa txāawe'sxtxi' peeygāhmée kastigaīna. Nawa vxitetx peeygāhna fxi'zesatxi' Dxuswa peeygāhçxa kastigaīmeena.

Dxusa's yaakxsath jīsa' āate kaavxya'ja'jwa'ja'

14 Adx yakthē'jwe'sx miiyajxwe: Maawa Dxus yakh fxi'zesath jīçxawa ew yūuna fxi'zeni yakh kaavxya'ja'jmeete', txã'wē yuwejuçxáa we'weniçxáa ¿seelpimanx?

15 Na'wē ūus yaakiga: Maa yakthē'jwa ropa ji'phmée txã'wēy ū'wa'jwa peejxsa ūsuna,

16 açá' txã'wēsa's i'kwe'sxa' uyçxa': Pxthaaga yuuna fxi'ze'. Nawa āçxha' wēmée kumamée ew mfxi'ze jīçxawa, txajx kakwete peejini's kīhçxáawa kaatu'jmeeçxa yuwejuçxáa txã'jīni' ¿kīhçxá' selpiima'k?

17 Txã'wē Dxus yakh fxi'zesath jīsa' āate kaavxya'ja'jwa'ja'. Txã'wēme', yuwejuçxáa txã'jīnisa' kxul yuja'.

18 Nawa na'jīwáatxna: Idxa' Dxus yakh fxi'zesaçxa', ¿ma'wē kaajiyu'juki'g Dxus yakh yuh fxi'zesan sūjkahn? Açá' kīhwa yūumeeçxawa mkaajiyu'j aan ājane'ga. Açá' adxa' ew yūuna pu'çxnisa yakhçxáa Dxus yakh fxi'zeni's āate kaavxya'ja'jya' āja'nja jītxna.

19 Idxa' teeçx Dxusçxáa cielute ūstewa txã'sa' ew jiine'ga ūuste. Txã'wē yūuni' ew yuja'. Nawa eçxthē'jwa Dxus ūste ew jīita' idx na'wēy. Txã'wēçxaíitx ūukhna yaya'.

20 ¿Ma'wētega jiyu'çmée? Yuwejuçxáa Dxus yakh fxi'zesath jīni' kxul yuh yuuna, Dxus yakh fxi'zeni's āate kaavxya'ja'jmeete yu'.

21 Kwe'sx yaçğathê'j Abrahana' Dxusna yaakxni's âate kaavxya'ja'jna txajx nçxi'k Isaakha's altalte ikhya'wak yu'. Txã'wê Dxusna yaakxni's âate kaavxya'ja'pha'ga, Abrahana's Dxusa' yuuwemeesak vxit.

22 Æçha' ¿jiyugá'? Abrahana' âate kaavxya'ja'kh Dxusna yaakxni's sa' yuwejuçxáa Dxusna yaaki'th jímée, Dxusa's ũusuh jxuka yajkçxa âate kaavxya'ja'kh.

23 Abrahana' Dxusa's ũusuh jxuka yajkçxa kxtey yuupa'ga, Dxus librute na'wêk fxi'jni neeyũ: Abrahana' Dxus dxi'pte ewtek neeyũ jīna. Sa' txã'wêy Abrahana' Dxus namiku' jīnik neeyũ.

24 Æçha' jiyui'kwe, yuwejuçxáa Dxusa's yaaki'th jímée, Dxusna yaakiççxa' âate kaavxya'ja'jwa'ja'.

25 U'y kazx yuusáa Rahabwa Dxusna yaakxni's âate kaavxya'ja'kh na'wê yũuna: Txajx yatte piçthê'j peethegu'na pa'jsatx jxpa'gaçxa', txãa piçthê'jtx nwe'weçxa vxitee dxi'jsuk kaah txãa u'ya'. Aça' txã'wê ew yũupa'ga txã'sa' Dxus dxi'pte ewtek neeyũ.

26 Kwe'sx kakwewa ma'wêga ũus ji'phmeeçxa' uuníi yu', txã'wêy Dxusna yaaki'th jīnisa' seelpimeesa', ew yũuna pu'çxnisa yakh âate kaavxya'ja'jmeete yu'.

3

Kwe'sx thune' na'wêsa'

1 Adx yakthê'jwe'sx, maawa jxuka
kaapiya'jsaçxa' jīisatha'w sũhçxa

nuywe'wenuwe. Kaapiya'jsaçxawa jxpa'yajkx mfxi'zewe. Txã'wême', kaapiya'jsaiiçxáa thaakwe yuuwesa yu'nja'w.

² Maa yuhwa jiisa yu' meetha'w. Txãasa iitha'w kihtewa jxuka jxpuba'. Nawa maawa txajx we'weni's jxpa'yakxya' ãjana txã' ewsaçxah txã'wê yuuna. Sa' txã'wê yũuçxa', txajx kakwe'swa jxuka neeweya' ãjana.

³ Nwêese'khantha'w jiba yuwete fxrenu paathe', açá' txã'wê yũuçxa' jiba kakwe's ewsu kaajxa' ãja'tha'w.

⁴ Mjiyuwe, barko txakwe seena' walasa's wejxa wala fxiiisu jxũna u'juçtewa, barko's kaahsa' timon le'çxkwesajuçxáa tuphyna ku'lek kaja'. Açá' barko txakwe seena' walasaçxawa nwêese'je'k ma'wê kaathewa.

⁵ Txã'wêy kwe'sx kakwete thune wala le'çxkuêesa ji'ptha'w, nawa seena' yuh walasa na'wê we'weya' çxhãçxha'. Txã'wêy ipx makwe le'çxkuêesaçxawa, yu'kh makwe seena' walatewa jxuka kabuna.

⁶ Kwe'sx thunewa ipx na'wêysaçxá', kwe'sx kakwe's jxuka suwçxa naa kiwetewa jxuka ãawa'jsa's kwe'sx kakwete ki'pni ji'ptha'w. Bagaçxte yuhwa ũçxhamée infxiernote ipx na'wêsa'.

⁷ Yu'kh niimal vxite' êega fxuusa vxite' yu'gawe'sx eçx ma'wê seena' juuna'satxwa nasa' kaastxaja'jya' ãja'tx.

⁸ Nawa thune yu'sa' kim yuhwa kaastxaja'jya' ãja'çmeeta'. Txã' weneno ikhsa', txãa pa'ga kaastxaja'jya' ya'ãja'çme'.

⁹ Txãa thuneju Dxus kwe'sx Tatanawa

węçxana tuuthe'je'tha'w, sa' txãa thunejuxçxáa nasatxwa wëesxuna ewméé açewe'we'tha'w Dxus taki'jçxa nvxiitnisatx.

¹⁰ Adx yakhthē'jwe'sx, txã'wē yu' txãa yuwe-juxçxáa Dxusna tuuthe'jna ki' açewe'wena yu-uwa'jme'.

¹¹ Teeçx yu'ĩçteçxáa yu' sxūusa kasehna ki' yu' yaasawa ¿kasehma'k?

¹² Adx yakhthē'jwe'sx, miiyajkxwe: Sxlala tasxa' ¿uhçe yūnya' ājama'k? Aça' uçe tasxa' ¿sxlala yūnya' ājama'k? Txã'wēy teeçx yu'ĩçteçxáa yu' e'z jwed kasejxa' āja'çme'.

Na'wē yuunisaçxáa kīhtewa wala jiisa yuunisa'

¹³ I'kwe'sx ksxavxyte kīhtewa wala jiisa ũsçxa', kīhtewa puiimée zhiçxkwe fxi'zewa'ja's mkaavxya'ja'jwe. Txã'wē wala jiisa' kīhtewa juuna' iuwejçx yajkxna fxi'zewa'jme'.

¹⁴ Nawa i'kwe'sx ũuste ewméé yajkçxa pui'nja sūhna yaakksa' txã'wē wala jiith sūhna iuwejçx yaakxwa'j ji'phme'. Txã'wē yaakksa' kīhte yuhwa jiimeesa ĩsxiisa yuuna.

¹⁵ Txã'wē ewméé yūuwa'jçxáa ũusuthenisa' Dxus kaaūusuthe'jnime'. Naa kiwetewe'sx peekx i'kwe'sx ũus yaakxnisaçxá' eçxthē'j kaaūusuthe'jnisa.

¹⁶ Mteewa iuwejçx yaakxwa'j kasehnijū' pui-iwa'jçxáak vxya'. Aça' txajūyā'j yu' jxuka suweena ewmeesaçxaçxáak kaseje'.

¹⁷ Nawa Dxus kaaūusuthe'jni's ji'phsa' kīhtewa pkal yuumée fxi'zena, ewçxáa yūuna,

puiimée nasatx peeygãhna, ãsxiimée isa we'wena.

¹⁸ Aça' puiimée ewçxáa yũuna fxi'zewa'ja's pa'pçxusa' ew wět fxi'zewa'ja's uyuuna.

4

Naa kiwetewe'sxa's selpiite', na'wěk ya'yu'

¹ I'kwe'sx pwe'sx puii jxpakwena fxi'zeni' ħmajũga kaseje'? I'kwe'sx ũusujk kaseje', ewmée yũuwa'ja's yaakxpa'ga.

² Vxitee ji'phunitx iiyamu wěeçxawa ãjameeçxa', ikhya'çxáa i'kwe yaaki'. Vxite nasa kĩhçxáawa ji'phte', txã'sna kusa'jya' ãjameeçxa', puiiya'çxáa i'kwe pa'pçxu'. I'kwe'sx peejini's Dxusna pějxmeeçxa i'kwe uyya' ãja'çmée.

³ Pějxçxawa, jxpa'gaya' yu' ãja'çmée i'kwe, txã'wě ewmeete kseelpi'jya'çxáa pěypa'ga.

⁴ Dxus yakh weh yuhwa ewmée fxi'zesa mwěese'jwe: Naa kiwetewe'sxa's selpiina fxi'zesa' Dxus yakh puinisate jiimeewá'kwe. Maawa naa kiwetewe'sx yakhçxáa wět fxi'zeya' yaakxsa' Dxus yakh puisak yu'.

⁵ Txã'wětewa, kwe'sx ũuste nvxiitnisa Dxus Espiritu' wala kçxhãaçxha'jna ũsa' jĩ'k Dxus libroute fxi'jnisa' txã' ãsxiinisame'.

⁶ Naapkaçxha' Dxusa' jweeíçxáak kwe'sxtxi peeygãhçxa pu'çxhi' kĩhtewa. Txajíik Dxus libru' na'wě pta'sxi': Dxusa' pu'çxhi'çme' iiwejçx yaakxsatxi', nawa iiwejçx yajkxmée fxi'zesatxi' wala peeygãhna pu'çxhina jĩ'k.

⁷ Txãa pa'ga Dxusçxáana nwěese'jçxa eçxthě'ja's nwěese'jmée çxhãçxha miijajkxwe,

aça' eçxthē'ja' i'kwe'sx tasxu ājameeçxa txuteena u'jwena.

⁸ Dxus tasxte mutxaawe, aç'a' txāawa i'kwe'sx yakh utxaana. Pkalsawe'sx, ewmée yūuni kusetx miiyaatewe. Txā'wēy Dxusa'sçxāa yajkxmée e'z jwed yaakksa i'kwe'sx ūusa's miiyaatewe.

⁹ Sa' txā'wē āhmeene'tka'w yūu sūhna miiya-jkxwe, sa' sxijkana fxi'zepa'ga āçxha' ū'newa'ja's miiyajkxwe, sa' weçxana fxi'zepa'ga āçxha' nxuswa'ja's miiyajkxwe.

¹⁰ Āçxha' Dxus dxi'pte seena' yuh āhmeekwesa myuuwe, aç'a' txā'wē yūusa's walasa vxituna Dxusa'.

Yakhthē'jwe'sxtxi ewmée nuywe'weni

¹¹ Yakhthē'jwe'sx, i'kwe'sx pwe'sx puutx ewmée ya'nuywe'wenuwe. Maawa yakhthē'ja's ewmée nuywe'wesa' Dxus jxkaahni ley peeygāawa'ja's we'we'k txā'sna weeçxsa yuuna. Aç'a' Dxus jxkaahni leya's weeçxsa' txāa leya's nwēese'jepkaçxte leya's jxkaahsa na'wēsa yuuna.

¹² Txāa pa'gatey leya's nvxiit-sa' teeçx yuuçxāa ūsa'. Txāaíçxāa ewmeete nvxiitwa'jsa' sa' txāaíçxāa ki' nwe'weya'wa ājawa'jsa'. Txā'wēte', çidxçxāa jwee kimçxaga txā'wē yakhthē'jwe'sxtxi' ewmée nuywe'we'?

Kuskuskhē' kīh yuuya'watewa jiimeek ya'fxi'ze'

¹³ Āçxha' i'kwe'sx na'wē we'we'i'kwe txā's mjiyuwe: I'kwe'sx we'weçxa': Āçxh u'jmeeçxa' kuskusa' u'jwe'nja'w çxhab walan. Kxtee pa'jçxa teeçx anxu mjiiçxa vxyu wala knayna ūsu'nja'w jī'i'kwe.

14 Nawa kuskus fxi'zewa'ja's jiiimée i'kwe. Kwe'sx ïtxi fxi'zeni' na'wěsaçxá': Yu' ahwa ma'wěga tudteçxáa vxyaaçxa' êekhêe pçu', txã'wěysaçxá' ïtxi fxi'zenisa'.

15 Txãa pa'ga na'wěçxáa yaakxwa'ja: ïtxi fxi'zewa'j Dxus peesuwaána aç'a ma'wěçxáawa mjĩ'nja'w jĩwa'ja'.

16 Nawa txã'wě yajkxmée ũuste iiwejçxçxáa i'kwe yajkxçxa we'we'. Txã'wě yajkxçxa we'wenisawa ewmeesaíçxá'.

17 Maawa ew yũuwa'ja's jiiçxa ew yũumeeçxa', Dxus dxi'pte yuuwesa yuuna.

5

Ji'phsawe'sx mpa'yajkxwe

1 ãçha' wala ji'phsawe'sx mwēese'jwe: I'kwe'sx ji'phuni pçuute seena' yuh nxussa pa'jana txã'sna yajkxçxa weyna mpebeewe.

2 I'kwe'sx ji'phunisa' kĩh yuhwa seelpime' jxuka wa'wani', aç'a i'kwe'sx ropa ewsawa txã'wěy jxuka wes ũ'ni'.

3 I'kwe'sx vxyuu beh vxyuu çxihmewa jxuka iz ũ'ni', aç'a txãa vxyu iz ũ'nisaíçxáa i'kwe'stxi' seena' wala ewmée nxus kiwete akhwa'jsa'. Txãa vxyu' i'kwe'stxi' ivxiituya'wa' ipx na'wě. Naa nmeh ensu' i'kwe'sx ji'phuni's iiméh wala jxaaw i'kwe.

4 I'kwe'sx uuthasxte mjĩisa yuul pēyni's Dxus cielute jxkaahna ũssa' wěse'kh, aç'a i'kwe'sx piuntxi yuulunisa txã'wě i'kwe'stxi' ewmeete nvxiht-ya'wa'.

⁵ I'kwe'sxa' naa kiwete ji'phunisa yakh wala wēt weçxana fxi'ze'i'kwe tajkx na'wē niisxna txāa pa'ga ikhwa'j en pa'jya'wa'.

⁶ Nasa ewmeesata' jīçxa i'kwe'sxa' ewteçxah ikhe'i'kwe yuuwemeesatewa, aç'a' txāawe'sxa' kxulteçxáa uuwa'ja's ji'phu'tx.

Thēysa pa'thewa nxusmée fxi'zeni, txā'wēy aç'a'sa pa'gatewa Dxus yakh puutx we'wena

⁷ Txā'wē pkxuuctewa, yakthē'jwe'sx nxusmée çxhãçxha miijajkxwe, kwe'sxtxi jxpe'jsa Jesukristo naa kiwete kīhpkaçx. Ma'wēga mjīisawa uhçxa' kuçxwa'jmée ūythasu', nus en skhēwte', ū'a's wala pkhakhe'nja sūhna.

⁸ I'kwe'sxwa txā'wēy kuçx yajkxmée çxhãçxha yajkxna mūythaswe. Txā'wēme', kwe'sxtxi jxpe'jsa Jesukristo kīwa'ja' utxaaça'.

⁹ Yakthē'jwe'sx, puutx ūusçxawe'wena fxi'zenuwe, Dxusa' i'kwe'sxtxi ewmeete nvxiitkahmen. Txā'wēme', yuwee ku'le'sa khuēs pa'jwa'j en utxa yā'j ūsa'. Txā' Dxusa'.

¹⁰ Txāniitey Dxus yuwe's pta'sxsawe'sxwa ma'wēta pxthaa yuuna fxi'zeçxawa Dxusçxáana yajkxna fxi'ze', txā'wēy thēysa nxuswa'j vxyaatewa, Dxusçxáana yajkxna mfxi'zewe yakthē'jwe'sx.

¹¹ Txā'wē pxthaa nxuste fxi'zesatxi' Dxus yakh wēt fxi'zesata' jī'tha'w. Job pxthaa nxuste wantāyna fxi'zete', nmehte' Dxusa' wala peeygãhçxa pu'çxni's iiwēse'ji'kwe i'kwe'sxa'. Dxusa' peeygāasa', txāasa pu'çxya' ūsa'.

12 Adx yakhthē'jwe'sx, wala mpa'yajkxwe. Isasa's jiį́xa' jiith jīwa'jçxá', sa' jiiimeęxa' jiimeeth jīwa'jçxá'. Txã'wē Dxus uyte jiiimeeth jīwa'jme', sa' cielu kiwe txã'wēsatsxwa kxsusna pta'sxwa'jme', Dxusa' ewmeete nvxiitkahmen.

13 I'kwe'sx pwe'sx maawa nxuste fxi'zena ũsçxa', Dxusçxáana neewe'wena meswe. Maawa wēt fxi'zena ũsçxa', Dxusa's weçxana memna meswe.

14 Maawa akate uuya' ũsçxa', ancianowe'sxtxi mpa'yawe, aç'a' txãawe'sxa' Dxus kusete neewe'weçxa aceite ki'putxna.

15 Txã'wē Dxusa' pu'çxhina sūhçxa oraíte', aç'a'sa pkala' peltunāyni yuute, aç'a'sa' ewte neeyūuna, txajū' Dxusa' nuykatxhina.

16 Dxus dxi'pte āhmée yūuni's puutx ya'mpeeta'sxwe, aç'a' Dxusa's yakhthē'jwe'sx neewe'wete', aç'a'sa' katxhine'kwe. Dxusna nwēese'jsa txã'wē ũusuh jxuka Dxusna yajkxçxa neewe'weni', kīhtewa jxuka pu'çxwa'jsa'.

17 Ma'wēga Dxus yuwe pta'sxsa Eliaswa kwe'sx na'wēysaçxáaçxawa, nus pa'khamen Dxusna ũusuh jxuka yajkxçxa neewe'we, aç'a' nus pa'jme' tekh anxu y medio āhpkaçx.

18 Txajū' ki'kin Dxusna neewe'wek nus kīikahn, aç'a' naa kiwete ki' nus pa'the', uuthasx çxhāçxhatx.

19-20 Adx yakhthē'jwe'sx mjiyuwe: I'kwe'sx maawa Dxus dxi'pte jxpubate', jxpubasame' txãa jxpubasa's ewmée dxi'ju kaasxwedu'juna. Sa' txã'wē yūuçxa' jxpubasá ũus jxukate vxituwa'j yā'j ũstewa, nwe'wesa yuuna, sa' maazkuēe pkaltxiwa kaapeltunaĩ'jsa yuuna.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd